

Ո Ր Ո Շ ՈՒ Մ

Ճանապարհային ոստիկանության վարչական իրավախախտման վերաբերյալ գործով
19.06.2021թ. կայացված ԱՖ606978 որոշումն անփոփոխ, իսկ վարչական բողոքն առանց
բավարարման թողնելու մասին

<<27>> 07 2021թ. 7-13- 11453

ք.Երևան

Ճանապարհային ոստիկանության պետ, ոստիկանության գնդապետ Ե.Կարապետյանս,
վերանայելով Արսեն Թադևոսյանի ՄԴ/52238-21 դիմումի քննարկման արդյունքում
ստեղծված նյութերը՝

Պ Ա Ր Զ Ե Ց Ի

Քաղաքացի Արսեն Թադևոսյանը (**ծանուցման հասցե՝** Լոռու մարզ, գյուղ Սարամեջ, 2-րդ
փողոց, 14-րդ տուն) դիմումով իր անհամաձայնությունն է հայտնել Ճանապարհային
ոստիկանության վարչական իրավախախտման վերաբերյալ գործով կայացված ԱՖ606978
որոշմանը՝ նշելով, որ երթևեկելիս թույլ չի տվել օրենքի խախտում, իսկ Ճանապարհային
ոստիկանի մոտենալու պահին գտնվել է կանգնած վիճակում: Միաժամանակ
հեռախոսակապի միջոցով պնդել է դիմումում նշված հանգամանքները, հայտնել է, որ
դիմումին ավելացնելու ոչինչ չունի և խնդրել է դիմումը քննել առանց իր մասնակցության:

Դիմումի քննարկման արդյունքում պարզվել է, որ վարչական ակտն ենթակա է
կատարման հետևյալ պատճառաբանությամբ.

Վարչական իրավախախտումների վերաբերյալ << օրենսգրքի 123.3-րդ հոդվածի
համաձայն՝ տրանսպորտային միջոցների անվտանգության գոտիները չամրակապած կամ
սաղավարտը չկոճկած վիճակում կամ առանց սաղավարտի տրանսպորտային միջոցները
վարելը, ինչպես նաև անվտանգության գոտիները չամրակապած կամ սաղավարտը չկոճկած
կամ առանց սաղավարտի ուղևոր փոխադրելը առաջացնում են տուգանքի նշանակում՝
սահմանված նվազագույն աշխատավարձի տասնապատիկի չափով:

<<Ճանապարհային երթևեկության անվտանգության ապահովման մասին>> օրենքի 24-
րդ հոդվածի 5-րդ մասի <<բ>> կետի համաձայն՝ մեխանիկական տրանսպորտային միջոցի,
ինչպես նաև տրամվայի վարորդը, բացի սույն հոդվածի երկրորդ մասում նշվածից,
պարտավոր է՝ կառուցվածքով նախատեսված անվտանգության գոտիներով կահավորված
տրանսպորտային միջոցներով երթևեկելիս լինել ամրակապված և չփոխադրել
անվտանգության գոտիներով չամրակապված ուղևորների:

Ուսումնասիրությամբ պարզվել է, որ 19.06.2021թ. ժամը 11:10-ի սահմաններում Ալավերդի
քաղաքի Բաղրամյան փողոցի հատվածում քաղաքացի Արսեն Թադևոսյանի վարած <<VAZ
21061>> մակնիշի 34PD913 հաշվառման համարանիշի ավտոմոբիլը կանգնեցվել է
Ճանապարհային ոստիկանության ՃՈ ՃՊԾ 2-րդ սպայական գումարտակի 5-րդ սպայական
վաշտի 2-րդ սպայական դասակի տեսուչ, ոստիկանության կապիտան Վ. Նիկողոսյանի և
նույն դասակի ավագ տեսուչ, ոստիկանության կապիտան Ֆ. Նորելյանի կողմից՝
<<Ճանապարհային երթևեկության անվտանգության ապահովման մասին>> օրենքի 24-րդ
հոդվածի 5-րդ մասի <<բ>> կետի պահանջի խախտման համար, այն է՝ վարորդն
ավտոմոբիլը վարել է անվտանգության գոտիով չամրակապված վիճակում: Ոստիկանության
ավագ լեյտենանտ Վ. Նիկողոսյանը կազմել է վարչական իրավախախտման վերաբերյալ

արձանագրություն, որտեղ համապատասխան տեղերում Արսեն Թադևոսյանը ստորագրել է, ինչից հետո տեսուչը Վարչական իրավախախտումների վերաբերյալ ՀՀ օրենսգրքի 123.3-րդ հոդվածով կայացրել է վարչական իրավախախտման վերաբերյալ գործով ԱՖ606978 որոշումը:

Ճանապարհային ոստիկանության ծառայողների կողմից տրված պարզաբանման համաձայն՝ քաղաքացի Արսեն Թադևոսյանը տրանսպորտային միջոցը վարում էր անվտանգության գոտիով չամրակապված վիճակում, նրա կողմից կատարված իրավախախտումը հիմնավորող՝ տեխնիկական միջոցների կիրառմամբ ձեռք բերված ապացույցներ առկա չեն, սակայն իրավախախտումն եղել է անմիջապես իրենց տեսադաշտում, ակնհայտ և պարզ տեսանելի, ինչի կապակցությամբ կազմվել է համապատասխան արձանագրություն և կայացվել ԱՖ606978 որոշումը: Միաժամանակ ոստիկանության ծառայողները հայտնել են, որ իրենց և վարորդի միջև ծառայողական բնույթի խոսակցություններից բացի այլ խոսակցություններ չեն եղել:

«Ճանապարհային երթևեկության անվտանգության ապահովման մասին» օրենքի 17-րդ հոդվածի 1-ին մասի «ա» կետի համաձայն՝ ճանապարհային երթևեկությունը կարգավորող ոստիկանության ծառայողը պարտավոր է սույն հոդվածի երրորդ մասով սահմանված կարգով ազդանշան տալով կանգնեցնել տրանսպորտային միջոցը, եթե՝ ակնհայտ կամ տեխնիկական միջոցների օգտագործմամբ երևում է, որ վարորդը խախտել է ճանապարհային երթևեկության կանոնների պահանջները, կամ տրանսպորտային միջոցի ընթացքը կամ տեղափոխվող բեռը, կամ վարորդը կամ ուղևորներն իրենց վարքագծով ակնհայտորեն վտանգ են ստեղծում երթևեկության անվտանգության համար: Նույն հոդվածի 8-րդ մասի համաձայն՝ երթևեկության սահմանված արագության գերազանցման և տրանսպորտային միջոցների ապակիների լուսաթափանցելիության սահմանված չափի խախտումների համար պատասխանատվություն է առաջանում, երբ՝ տվյալ խախտումը փաստարկված է համապատասխան տեխնիկական միջոցների կիրառմամբ:

Այսպիսով, դիմումատուի արարքում առկա են Վարչական իրավախախտումների վերաբերյալ ՀՀ օրենսգրքի 123.3-րդ հոդվածի հատկանիշները, ուստի ելնելով վերոգրյալից և ղեկավարվելով Վարչական իրավախախտումների վերաբերյալ ՀՀ օրենսգրքի 293-րդ հոդվածի 1-ին մասի 1-ին կետով՝

Ո Ր Ո Շ Ե Ց Ի

1. Ճանապարհային ոստիկանության վարչական իրավախախտման վերաբերյալ գործով 19.06.2021թ. կայացված ԱՖ606978 որոշումը թողնել անփոփոխ, իսկ վարչական բողոքն առանց բավարարման:
2. Սույն որոշումն ուժի մեջ է մտնում հանձնելու օրվան հաջորդող օրը և կարող է բողոքարկվել ՀՀ վարչական դատարան օրենքով սահմանված կարգով և ժամկետներում:
3. Սույն որոշման օրինակն ուղարկել Արսեն Թադևոսյանին և ՃՈ ՃՊԾ 2-րդ սպայական գումարտակ:



Ե. Կարապետյան